



# Schwoweblatt Nr. 12

zammgestellt vun **Helen Alba**  
1900 Timisoara, Calea Sagului 21, sc. B, ap. 43  
Telefon: 0256-245590  
E-Mail: [albah@web.de](mailto:albah@web.de)  
[www.lenauheim.de](http://www.lenauheim.de)



## Geld wie Mischt

Es is doch so in dere Stadt, dass mer eemol im Monat sei Taxn zahle muss, die for Wasser, Heizung, Verwaltung, Lift Putzfrau un alles Meeglich anfallt. Weil die Administratorin dann rumgeht for des Geld insammle, muss mer erschtens Geld han un zweitens derhem sin, wann se kummt. Weil jo die Rentner meh derhem sin wie mir, die mer noch arweite misse, han mer die Angewohnheit, e Tach vorher des Geld unsre Nochbre zu gin, mer will doch kem nix schuldich bleiwe. So han ich aach heit e Million vorbereitet, niwer traan wille, doch die Leit ware nit derhem. Ich han die zehnn Hunnerttausender uf de Tisch geleet un sin später nochmol gang. Weder ich noch die Nochberschleit han des Geld gezählt, for mich war die Sach abgetun. Foreeb mer schlofe gang sin han ich noch schnell die Kich ausgekehrt. Wie ich mit dem Bese die Brotskrummle vun unerm Tisch kehre will, kehr ich aach Geld zum Vorschein. Erscht war ich ganz perplex, weil Geld wie Mischt han mir noch nie ghat. Also han ich iwerleet, wie des Geld uner de Tisch kumm is. Un die Schlussfolgerung war, dass e Windzug wahrscheinlich e Teel vun dem Geld, des wu ich han wille am Nohmittach zu de Nochberschleit traan, runer un uner de Tisch gflattert is. Is nix weiter iwrich geblieb, wie die Nochbre wieder rauszustawre. Jetz han ich gsaat, dass mer mol des Geld zähle misse, des wu ich ne gin han. Un wirklich hat dervun gfehlt. Mir han gut gelacht un ich han mer vorghol, efter wie bisher die Kich auszukehre.... Mer kann jo nit wisse.....

## E starkes Ding

Der Compjuter is e starkes Ding,  
vun dem ich jetz e Lied eich sing.  
Er is for Jungi un aa Aldi IN,  
weil die Mensche heit recht fortschritt sin.  
Des Ding, des kann ganz eenfach alles!  
Drum die Leit dran finne Gfalles.  
Sie losse de Compjuter lukrate aa in der Nacht,  
weil mer am Tach vill anri Sache macht.  
Des Ding kann schreiwe, rechne, mole,  
dass for Freed die meischte johle:  
Jetz sin mer endlich aach soweit,  
dass uns reicht die wenich Zeit!  
Mir dricke Enter, tun hantiere  
un derbei ke Zeit verliere!

Des anri biet zurecht die Maus,  
sie is jetz de Herr im Haus.  
Alles scheen un gut, denk ich for mich.  
Doch losst uns die Technik mol im Stich,  
kann mer nimi suche noh Papiere, Notitze,  
alles Gschriebni muss im Kopp rumflitze!  
Weil ansunschte steht mer do mit dere Maus  
un weeb halt weder ein noch aus.  
Es Enter dricke helft aach nimi weiter,  
mer is mol wieder um ens gscheiter.  
Un holt hervor e Heft un Blei,  
weil es is nit eenerlei,  
ob schwarz uf weiß was gschriewe steht  
oder de Wind vun leere Ding her weht!

## Die Erbschaftsklausel (Ende)

**Bianca:** Mir han uns des so gedenkt: In unsrer Stadt is noch ke Copy-Center mit allem Drum un Dran. In so eem Center kann mer alles, was mit Computre zu tun hat mache: Technoredaktion, Layout, Scannen, Mails verschicke, surfe....

**Oma:** Was heescht Kennen? Kennelerne kann mer sich aach uf der Gass, des is billicher. Un Mehl verschicke, derzu brauch mer e Ross un e Waan, un schun is mer in der Miehl oder ufm Mark. Dass der nor wisst: Schlurfe kann ich aach, wann ich mei aldi Galotschn anzieh!

**Bianca:** Oma, jetzer sei mol ruhich. Des sin neimodischi Ausdruck, vun dene wu du ke blassi Ahnung hascht! Entweder du horchscht zu, oder....

**Oma:** Oder was? Ich kann rede was un wielang ich will! Immerhin is es mei Geld, des was der zum Finschter nausschmeiße willt!

**Resi:** Mutter, loss des Kind ausrede! Wann du noh jedem Satz dei Pfefferkheere ninwerfe muscht, sitze mer morje noch do. Kimmer dich lieber ums Esse, mir han e Mordshunger!

**Bianca:** Schau Omchen, mir were dich als Inhaberin.....

**Oma:** E Haberin war ich, wie ich noch ke grooi Hoor ghat han! Jetzer sin ich e aldi Schachtl!

**Bianca:** Also Oma, jetz reichs mer! Du kantscht jo de Scheef ufm Papier sin meinetwegen....

**Oma:** E Scheef, der was nix zu saan hat? Nee, dankscheen! Entweder mit alli Rechte oder...

**Bianca:** Kumm Roland, mir reichs!

(Die Oma trippelt hin un her, leet die Hand vor die Augen, seifzt tief)

**Oma:** Kummer mer also zu eem Resultat! Ihr bringt eier Zentrum uf die Been. Un ich wer aach e Klausel infiehere, bevor ich eich des ganzi Geld verloddre loss! Ich will des beim Notäri schriftlich hinerleje, dass ich des Geld meiner Enkelin nor lehne tu! Irgendwann, wann des Zentrum Gewinn abwerft, misst der mer alles uf Heller un Pfennich zuruck gin! Gut gemerkt: Zuruckgin! Nor so sin ich mit eirem neimodische Firlefanzen inverstann!

**Bianca:** Oma, hascht schun recht! Was de Hans-Onkel hat kenne, des kantscht du aach! Also, Mami, Tati, Roland, gellt mir sin bereit, aach die zweiti Erbschaftsklausel in Kaaf zu holle un zu akzeptiere?

(E dreistimmiges Jo is zu heere)

**Resi:** So, un jetz decke mer de Tisch nowl, du Roalnd laaf un kaaf e Flasch Schampanjer, dass mer anstoße!

**Florin:** ich will.....

**Oma:** Bratze weg Florin, es is noch lang nit dei Gschäft! Du kantscht heekstentens als Laafbursch insteije, for was anres....

**Bianca:** Ich meeht in Ruh zunacht esse! Gfrei je mer uns doch iwer unser Glick, uf der Oma ihre Glick besser gsaat! Weil sie is die Hauptperson in dere Gschicht. Un ihr han mers zu verdanke, dass mer bewiese kenne, was mer imstand sin!

**Oma:** Weh eich, wann nix rauskummt! Aach mei Geduld hat Grenze! Doch halle mer uns noh dem Sprichwort: Nur wer wagt gewinnt! Drum: Glickauf ihr owergscheiti Jugend! Morje schreibe mer dem Rechtsanwalt, dass die Erbschaftsklausel for uns alli iwerhaupt ke Problem is! Die Hauptsach, mir kummer je schneller zu dem Geld!

### **Mit der Kichewoo beim Kupferpacke**

In dem Summer han mer wieder Gäscht aus Deitschland ghat. Mei Taafgoth, sie werd im näkschte Johr 80, war do uf Bsuch. Weil die weiti Reise in dem Alter schun beschwerlich is, hat die Goth sich schweren Hertzens iwerrede gelosst, mitm Flieger zu kummer, weil se unbedingt hem hat wille. Un sie is glicklich un problemlos angfloo kumm, hat e Zeit erwischt, wu´s nit gar so heiß war. Es Verzähle hat ke End holle wille. An eem Owet han mer schun im Bett gelee, do hat die Goth no gement, dass die Fliejeerei jo aarich kummod is, awer sie hätt doch geere meh Gschenker mitgebrung, doch die Vorschrifte sin halt wie se sin, un jedi Person derf nor e Kupfer mit 20 Kilo mitbringe. Un noh hat se an dem Kupfer e ganzi Wuch lang zu packe ghat. Jedes Mitbringensel, ihre Gwand un was mer halt so noch uf e weiti Reis mitzuholle hat, hat se scheen der Reih noh uf ihrer Kichewoo abgewoo, alles scheen uf e Zettl gschrieb, manches beiseit geleet, anres is noch derzu kumm. Un e Tach vor em Abflug hat se noch immer 900 Gramm zuvill ghat. Sie hat wieder vun vore anfang zu wieje, dorchzustreiche, derzuzuschreibe. Un so war schun halbnacht, bis se mol mied war, de Kupfer zugschnallt un in de Ecke gstellt hat. Wie se nohder am Flugplatz mit schlottriche Knie ufs Urteel gewart hat, hat wirklich ke Menscheseel was kommentiert. Also stimmt die Kichewoo, e Erbstickl vun ihrer Urkukandl, harrgenau!

### **Frohgemut in de Urlaub!**

Heit meeht ich alli Schwoweblatt-Leser e angenehme, nit zu heiße Summer un guti Erholung winsche! Ich mach jetzer aach Ferien, mei Urlaub steht vor der Tier un mir fange an, unser Bindl zu packe, weil mer im Sinn han, ins Bad zu fahre. Es is heit e koschtspielichi Sach, sei Rheuma auszukuriere. For so e Behandlung mit Koscht un Quatier han se mer bei so eener Agentur 20 Millione Lei abzappe wille (for zwaa Persone natierlich). Ich sin bal uf de Rick gfall, han gschaut, dass ich nauskumm vun dorte. Un mir fahre jetz uf eigeni Fauscht los, denke halt, mir were schun was finne, was unser Schreibichl nit allzu stark strapaziert un hoffe, ausgeruht, frohgemut dernoh weitermache zu kenne. Drum liewi Leser, macht Eich ke Gedanke, wann eich des Schwoweblatt e zeitlang nit ins Haus flattert. Es is nit meh passiert, wie dass ich in die Berche fahr un nit weeb, wann genau dass ich zuruckkummer tu. Wann ich wieder do sin, gehts weiter. Tschüss bis dann!